



**ÁLVARO VILA ARAUJO**, voceiro do Grupo Provincial Socialista da Deputación de Ourense, en base ao previsto na Lei de Bases Reguladora do Réxime Local, ó artigo 91 e 97, entre outros, da Regulación de Organización, Funcionamento e Réxime Xurídico das Entidades Locais e o Regulamento desta corporación presenta unha **MOCIÓN PARA A DISOLUCIÓN DO INORDE COMO ENTE AUTÓNOMO E A INCORPORACIÓN DA SÚA MISIÓN E PERSOAL NO SEO DA CORPORACIÓN PROVINCIAL**.

Creado en 1987, o Instituto Ourenán de Desenvolvemento Económico (INORDE) preséntase coma un organismo autónomo local de carácter administrativo dependente da Deputación de Ourense. Segundo os seus estatutos, aprobados pola Corporación Provincial o 24 de setembro de 2004 para adecuarse á lexislación entón en vigor e cuxa derradeira modificación data do 31 de xaneiro de 2020, na súa condición de organismo autónomo local de natureza administrativa trátase dunha “entidade de dereito público con personalidade xurídica propia e autonomía económica e administrativa para a realización das súas fins, así como para a xestión do seu patrimonio” (Artigo 2.1). No artellado estatutario sinálase tamén que o INORDE “queda adscrito á Presidencia da Deputación Provincial” que “poderá delegar o exercicio de todas ou algunhas das súas facultades que lle corresponden como órgano de adscrición nun deputado da Corporación (Artigo 2.2).

A aportación en 2024 da Deputación de Ourense ao INORDE ascende a 2.369.000, representando case que o 70% do total do orzamento do ente “autónomo”, que conta cun presuposto total de 2.856.204 euros para este exercicio. As seguintes achegas máis representativas dentro do apartado de transferencias correntes proveñen da Xunta de Galicia, a través da Consellería de Medio Rural e a Dirección Xeral de Planificación-Ordenación Forestal, con 90.500 e 80.000 euros respectivamente; e de fóra do Estado, vía os proxectos RAIA SECA (63.375 euros), CIRCULAR ECOSYSTEMS (52.350 euros) e POST (35.901 euros). Aínda que sobre o papel o INORDE conta co seu propio orzamento e de capacidade de xestión do mesmo, a instancia depende absolutamente das asignacións da Deputación de Ourense, sendo mínimos os fondos que capta doutras administracións, coma subvencións e fondos europeos.

Amais de no económico, a pretendida “autonomía” do INORDE tamén choca coa súa case total dependencia administrativa e operativa por parte da Deputación de Ourense. As funcións de asesoría legal corresponden ao secretario xeral da Deputación e as labores de control e fiscalización internas da xestión económico-financeira e orzamentaria recaen no interventor da propia Corporación Provincial (artigos 7.1 e 7.2). Malia os formalismos de concorrencia dun Consello Reitor (artigos 7, 8 e 10) e dunha Comisión Executiva (artigos 10 e 11), o INORDE está absolutamente supeditado á supervisión, escrutinio e control da Deputación, que determina as liñas principais de actuación e designa aos seus responsables (artigos 12 e 13), consagrándose de facto un



réxime de tutela (Artigo 14). A acción do INORDE atópase aliñada coa política e estratexia global da Deputación, nomeadamente do partido que ocupa o poder, que pon e quita aos seus responsables.

Sen ser exhaustivos, queda ben ás claras que, baixo unha particular natureza, o INORDE non é máis que unha extensión da Deputación de Ourense, un servizo redobrado que se solapa coa acción doutros departamentos da Corporación Provincial. A Deputación traballa nas súas diferentes áreas e servizos a prol do desenvolvemento integral da provincia no social, económico, cultural e medioambiental. A través do apoio a concellos insiste no auxe do rural, promovendo o turismo e apostando pola innovación e a sustentabilidade, que son os eidos nos que está tamén chamado a intervenir o INORDE. Sen éxitos salientables, son contadas as deputacións españolas que contan con estruturas similares á do INORDE. No ámbito galego é habitual que os plans de desenvolvemento económico se inscriban en programas de actuación non dislocados das propias deputacións.

Xunto coa ausencia de autonomía de facto da Deputación de Ourense e o redobramento da propia acción da Corporación Provincial, o INORDE tampouco representa: 1) un modo de optimizar recursos, apuntalando a eficacia administrativa, a flexibilidade organizativa e/ou certas economías de escala; 2) nin unha mellor coordinación estratéxica, caracterizada por unha requintada planificación integral e/ou simplificación burocrática; 3) nin unha meirande transparencia e control na toma de decisións e xestión de recursos; 4) nin tan sequera permite avanzar na visibilidade e representividade do INORDE -dentro e fóra da provincia- como entidade protagonista no desenvolvemento provincial. Ben ao contrario, o INORDE representa un modo de pensar e xestionar a provincia acaído con realidades supostamente pasadas. Nesta orde de cousas, chama a atención que desde a súa entrada en función a media de gasto en persoal situouse entre o 50-70% do orzamento do Instituto. Ben que en 2024 os gastos de persoal ascenden a 1.398.033 euros (40% do total), a estes habería que engadir 20.137 euros en indemnizacións e dietas, 10.000 euros en gastos de representación e 4.500 euros de locomoción para persoal.

Xustifican os resultados do INORDE tales dispendios? Ata cando a crenza na reformabilidade do INORDE, en funcionamento desde 1987 sen admitir a máis mínima corrección para devir unha estrutura minimamente funcional aos intereses da provincia? Non están suficientemente garantidas as misións do Instituto a través dos servizos da propia Deputación? Non traballa xa arreo a Corporación Provincial no desenvolvemento e mellora das condicións económicas e sociais da nosa provincia? É necesario seguir na senda de irracionalidade administrativa, falta de coordinación e duplica servizos, desbaldir recursos e manter a opacidade e descontrol na xestión de recursos públicos? É realmente preciso manter a ficción que representa o INORDE?



## **Grupo Provincial Socialista**

Rúa Progreso, 32 – 2º andar

32003 Ourense

Tlf. 988 317 972

CIF: G32244345

Por todo o exposto o Grupo Provincial Socialista presenta as seguintes **PROPOSTAS DE ACORDO**:

PRIMEIRA.- Instar á Deputación de Ourense á disolución do INORDE e que os departamentos e servizos da Corporación Provincial asuman as misións e proxectos que supostamente desenvolve o Instituto.

SEGUNDA.-. Instar á Deputación de Ourense á integración do persoal do INORDE nos departamentos acaídos da Corporación Provincial en función dos seus perfís e experiencia profesional.

En Ourense, a 9 de outubro de 2024.

Asinado: **Álvaro Vila Araujo**

**SR. PRESIDENTE DA DEPUTACIÓN PROVINCIAL DE OURENSE**

[socialistaourense@gmail.com](mailto:socialistaourense@gmail.com)

 [Facebook: PSdeGdeOurense](#)

 [Twitter: @PSdeGDepOU](#)